



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7

Yangia anidakangma :



Tir Yimyim



tir_yimyim




tir yimyim

TAPAK 8

Iran supreme leader inyaktsü Mojtaba Khamenei shimogo

Iraq coach-i World Cup play-off thinendaktsüner



VOL. XXIII ISSUE NO. 146 (ADOK 146) DIMAPUR SANGTENNÜ (TUESDAY) METSÜREMI (MARCH) 10, 2026 ₹ 5.00

Nagaland Police recruitment criteria reprangshimtsü mepishir

Kohima, March 9, 2026 (TYO): Hombarbnü Nagaland Legislative Assembly (NLA) nung police constables shimoktsü recruitment criteria atema tebilemstü abenba lemsatepogo.

Question Hour mapang MLA aikati physical aser written tests telatetba meyipa reprangshitsü shidangogo.

Deputy Speaker S. Toiho Yeptho menden ser session alidang January 2026 nung Nagaland Police constable 1,176 shimoktsü indang recruitment drive onük benoka lemsatep.

Candidate temi physical efficiency tests nung tamakok anguba ajanga mapa 80 tazüng lir.

"Mapang talangka lir külen sorkari recruitment alitsü lemtetba atema tenüngsang agütsür, kechiyong iba ya Nagaland nung zünger mapa mangurtem asoshi maongka ka lir. Ajisüaka, mapa 1,176 advertize asüba nungi district pungu nung mapa 80 tazüng aliba atema süoki ia bilemer" ta Advisor Tongpang Ozukum-i ashi.

Mapa tazüng teimtibaji Mokochung district nungi lir aser idakji mapa tazüng 43 lir. Iba sülen Tuensang nung mapa 32, Tseminyu nung 3 aser Longleng o Wokha nung mapa kaka tazüng lir ta pai ashi.

Iba ya Department tai masü saka recruitment drive balaka ajanga mesüra tarutsü recruitment nung backlog posts nung dendaktsür item district asoshi maongka ka agütsü junger ta Tongpang-isa tebilemba ka lemsatep.

"Nagaland Police constable mapa 80 tazüng lir aser iba asoshi

recruitment balaka, saka mapa tazüngtemji pei pei district aser kintem atema yutsütsü aser taruba recruitment drive nung backlog vacancies ama bener aotsü" ta Deputy Chief Minister aser Home in-charge Y. Patton-ashi.

"Iba recruitment drive nung physical aser medical tests timi agiba atema tenüngsang agütsür saka written examination asoshi tebilemstü abener. Basic qualifications aliba candidate temi highly educated graduates den tokteptsüsa aküm aser iba ajanga tetoktepbaji meputep liasü. Anungji department-i iba inyakyim meyipa reprangshimtsüla" ta MLA Kuzholuzo Nienu-ia ashi.

MLA Achumbemo Kikon-ia written marks nung kanga temulung magütsütsü saka physical tests nung ang tenük yoktsü tebilemba ka lemsatep.

MLA temi ashiba onüktem asadangtsü aser recruitment system meyipa reprangshitsü ta Y Patton-i langzü.

"Police asütsü atema physical fitness tongtipang lir aser candidate temia iba amaji temang anepalutsüla. District balala nung mapa tazüngtem asoshi maongka tanaben agütsü nung ajungtsü aser mapa tazüngtem odang meyuetsütsüla" ta Chief Minister Neiphiu Rio-ia ashi.

Nagaland Police recruitment atema minimum educational qualification ji forward tribes atema Class 8 aser backward tribes atema Class 6 lir. Department-i taruba recruitment drive nung written aser physical tests tsüngda kasasa asütsü reprangshimtsü ta Patton-isa metetdaktsü.

Nagaland nung village councils tasen tentetstü tuyur

Dimapur, March 9, 2026 (TYO): Nagaland sorkari 2026-2031 kümsük atema state nung recognised villages ajak nung village council tasentem tentetba mapa tenzükogo.

"Tang aliba village council tem kümsük taruba ita ishika sülen tembangtsü anungji recognised villages ajaki Nagaland Village and Tribal Councils Act, 1978 den putepa züngsem tasentem shimtsü tetuyuba agütsür" ta Home Department nung Principal Secretary Abhijit Sinha-i ashi.

District shia nung Deputy Commissioner temi recognised villages nem osang tejangja agütsütsü. Nagaland Village and Area Councils Rules, 1979 nung

Rule 3 nung aliba ama anogo 15 tsüngda village council züngsem tasentem shimtsü parnoki tuyutsü ta Abhijit Sinha-isa metetdaktsü.

Village council züngsem tasentem shimba ya sobaliba nungi benshia aruba aser pei pei yimtsüng nung inyaksangshia aruba sülen anidaka inyaktsüla ta paisa ashi.

April 30, 2026 matongdang village council tasen shimba maparen tembangtsüla ta Home Department sangdong nungsa shia lir.

May 5, 2026 tashi nung Commissioner, Nagaland office ajanga state sorkar nem village councils nung züngsem tenüngtem agütsütsü ta sangdong nungsa shia lir.

Nagaland Assembly-i Dimapur railway station onük benoka lemsatep

Kohima, March 9, 2026 (TYO): Nagaland Legislative Assembly indang Budget Session 2026-27 anogo tasembuba nung küm 123 tain Dimapur Railway Station tajungba akümtsüba onük aser iba ali atsünga agiba indang tebilemstü benoka jembiogo.

"Dimapur Railway Station modernization project nung ashishitep adokogo kechiyong sendaktepa alir kati ka dak tai tongloksüteper" ta NPP MLA Nuklutoshi-i ashi.

Railway ketdangpurtemi sorkar dak tai tongloksür, sorkari ali kibur aser ali atsünga agirtem dak tai tongloksür, aser külen ali atsünga agirtemi land pattas agütsüba atema administration dak tai tongloksür ta Nuklutoshi-i ashi.

Mapang talangka senzüka yutsüba ajanga tebilemstü tuluba aküm. Kümtem süia arudang railway ali nung kiojen yangluaka Northeast Frontier Railway (NFR)-i ola madoki dang aru ta pai ashi.

Railway ali nung kiojen yangluaka railway ketdangsurtemi ola madok. Railway ali nung ozüng alema kibong 614 lir aser ali 53.806 hectares nungi 30.283 hectares shi ka atsünga agiogota data ajanga ashir. Iba tesem nung ki, dokan, hotel, tamangba yimsü kiojen aser school dena ozüng

alema kiojen 1,100 tema yangluaka lir ta NPP MLA Nuklutoshi-isa metetdaktsü.

"Iba ajanga Dimapur Railway Station ya world-class facility ka kümdaktsütsü sentong nung tetsükdaktsü ajurutsü akok. Iba tebilemstü den sendaktepa alirtem den jembitepa aruba sülen lenmang asem lir. Kaji resettlement plan atema Rs 132 crore shi agütsütsü, ozüng alema ali atsünga agirtem meindoktsü mesüra railway station indang ali ken o mebentetra Sukhovi mesüra Tuli leni belentsü" ta paisa ashi.

"Iba onük nung ashishitep kecha mali aser department, state sorkar aser NFR külemi yaritepa tekaratiba nung tebilemstü koktettsü atema merangdar" ta taoba Transport Minister P. Paiwang Konyak-i ashi.

India sorkari Amrit Bharat Scheme kübok Dimapur Railway Station ya world-class station ka kümdaktsütsü asoshi Rs 283 crore lemezüktsüogogo. Northeast nung Dimapur ya second-highest revenue earning railway station lir ta paisa ashi.

Department aser district administration-i December ita survey agiogo aser indangji railway station area nung ali kiburtem aser kiojen aliba jangjaogo. State sorkari NFR General Manager dangi shidi züluogo aser külen ali

kiburtemi Ministry of Railways dang ali aser kiojen atema temenok meshia shidi züluogo ta Minister Paiwang-isa shisem.

Ali kibur temi anasü agi teimba temenok meshiogo aser state sorkari iba atema Centre nungi telangzüba atar ta paisa ashi.

"Nagaland nung terenlok mapatong aika ali dak sendakba tebilemstütem ajanga mapang agir. Dimapur Railway Station ya 1903 nung lapok aser Nagaland nung railway station iba ya dang lir aser Amrit Bharat Scheme kübok world-class station ka akümtsü shimteta lir" ta Chief Minister Neiphiu Rio-ia ashi.

Kümtem süia arudang ali atsünga agi saka railway ketdangpurtemi ola madoki dang yutsü aser administrative officers kari land pattas agüja tesem kar nung ali kibur kümdaktsü. Anungji sorkar, railways aser ali kiburtem tsüngda tangatettep kati arutsü nüngdaker ta CM Rio-i ashi.

Ali aser kiojen raksaba atema temenok karbo agütsütsü akok saka anasü agi teimba meshiba ama magütsütsüla ta paisa metetdaktsü.

Railway station ya Dimapur nung dang alitsüla aser sorkari modernization project tetsükdaktsü melii inyaka aotsü atema Railway ketdangpurtem den iba onük lemsateptsü ta CM Rio-isa ashi.

Kohima nung ita aika lir rü tsüka tzünglu aru



March 9, 2026 nü Kohima nung rü tsükba sülen gari lenmang tezülen rü temelem ano yimsaa mao alidang agiba noksa ka angur.

Kohima, March 9, 2026 (TYO): Nagaland kübok tesem balala nung Hombarnü minute 40 shi rü tsüka tzünglu aruogo.

State ajungalen ita pezü tema tzünglu maruba sülen tanü tsüngsang ajanga nisungtem kanga anisüngzükogo.

State yimtiba Kohima nung ajungben tzünglu ya nübertemi kanga pelashishia agizüka liasü, kechiyong yaküm October ita

nungi tzübo, ayongnu aser ayong tilatem teimbaka kongadoker liasü.

Mapang talangka tzünglu maruba ajanga water supply nunga timtem ajuru aser Public Health Engineering (PHE) Department-i tesem aika nung water distribution ajema yoktsüsa tensa ka ajurua liasü.

Tanü tzünglu arudang nübertem temulung anisüngzük

aser tzünglu ajaa pelatepa liasü. Tesem aika nung nisungtemi rülong shimtener snowman yanglu aser social media nung photo o video tem lemsatepa liasü.

2025 tzüngluruwa mongpu nung Nagaland kübok tesem balala nung anentsüh aser tzümetsüng timtem balala ajurua liasü aser iba sülenbo tanü mezüng tzünglu tulu aruogo.

KDLSA aser Kohima Women PS lungjemer IWD amung



Kohima, Metsüremi/March 09 (TYO): Kohima District Legal Services Authority (KDLSA) ajanga Kohime Women Police Station den lungjemer March 8, 2026 nü "Give to Gain" omen kübok Women Police Station, Kohima nung International Women's Day munga liasü.

Mezivolu T. Therieh, NJS, Chairperson, KDLSA and Principal District & Sessions' Judge, Kohima ajanga tetsür police den tayongzükba o jembia aser parnoki bendanga agütsür tasü ita tetsür temi police force inyakba asoshi tenüngsang agüja liasü.

International Women's Day anogomung nung lai tetsür police temi takok anguba kisüng masü saka nübur tenzükba mapa bendanga agütsür ola madoki meranga inyakba asoshia tenüngsang agüja liasü.

Police mapa ya temela mashi, kechiaser yangi yimya tajung, taremzük, tasü tait aser aiben pei jurila bendanga agütsütsüsa akumer, ta Therieh-i ashi tetsür

police temi pei mapa den kibong aser lokti mapa kanga junga benteta inyakba asoshi tenüngsang agüja liasü.

Uniform asemba ya mapa indang kisüng masü saka ochi asoshi nokdaksü, timtem nung alirtem kumzüka ayutsü aser ochi wazüka ayutsü asoshi bendanga agütsüba temaitsü lir, ta lai ashi.

Tetsür aser tanurtem adenba ken o tem temeim agi anepalua amshia obendang shidak agütsütsüla, ta ashi.

Cheliam Khiampiungan, NJS, Secretary, KDLSA and chief judicial magistrate ajanga omen nung ajemdaker jembidang, tetsür police temi bendanga agütsür inyakba asoshi pelaba lemsatep aser tetsür temi takok anguba ajanga nisung ajak ajangzükler ta shia liasü.

Tetsür tem tetsübo makai alitsü aser akumtsüboa amshitsü aser maangka kasa agütsütsü nüngdakba indang jembia liasü.

Iba sentong nung Officer-in-Charge, Kohima Women Police

Station, Dsiesenguno Bio-ia lai ajangshibatem lemsatep aser KDLSA-i parnok den yaritepba asoshi pelaba shisem.

Panel Lawyer Mika Aye-i POSH Act, Maternity Benefit Act (1961 & 2017 amendment), Domestic Violence Act aser Constitution nung tetsür nem temeden agüja aliba indang rateta ashi.

Laisa Tseminyu nung March 9, 2026 aser Kohima (DC Complex) nung March 13, 2026 anogotem tetsür temi timtem ajuruba ken o jembitsü asoshi "Mahila Jan Sunwai" (public hearing) agitsü aliba indanga lemsatapa liasü.

Neisezonuo Legeise, Assistant Public Prosecutor ajanga Women Police ketdangsür tem den külemi inyakba mapang ajangshiba lemsatep aser tetsür maneni yaritsü ajungmesoa liasü.

Iba sentong nung Panel Lawyer Kusalu Lohe menden liasü, kong tetsür police 18, para legal volunteers asem densema panel lawyers pongu dena liasü.

Dimapur nung National IP Yatra agitsü

Dimapur, Metsüremi/March 09 (TYO): National IP Yatra kübok Intellectual Property Rights (IPR) indang workshop Integrated Business Hub & Innovation Centre, Forest Colony, Dimapur nung March

12 & 13, 2026 anogotem agitsü. Iba sentong ya IPFC ajanga Ministry of MSME, Government of India kübok IDAN den lungjemer ayongzükler.

Iba sentong ya start-ups,

MSMEs, entrepreneurs, business owners, artisans, creators, artists, Self Help Groups (SHGs), Farmer Producer Organisations (FPOs), NGOs, scholars aser researchers atema alitsü.

HCCWA ajanga International Women's Day ayongzük



Dimapur, Metsüremi/March 09 (TYO): Holy Cross Catholic Women Association (HCCWA) ajanga Honibarnü Holy Cross Auditorium, Dimapur nung International Women's Day nüngtem nung sentong ka ayongzüka agia liasü.

Iba sentong tenzükba Rev. Fr. John PM, Parish Priest ajanga Holy Mass agi aser iba Mass mapang Rosemary Rongmei, President, Women's Association ajanga 'first reading' agi aser K.

Sylvia Zeliang-i anir Rensporial Psalm agia liasü.

Iba sülen second reading ya Kilim Ruth-i ashi aser Khono Maria-i anir Prayer of the Faithful agia liasü.

Session tanabuba ya Caroline, President, HCCWA lenisüba nung agi aser o jembir Rev. Sr. Ethel Yanthan, NCWA Women Coordinator liasü.

Yanthan-i jembidang, tetsür temeden asoshi nokdakba movement tenzükba puti otsü

lemsatepo aser 1908 küm tetsür 15,000 shi New York City nung mapang inyakba mapang tatsüba, taa tajungba aser vote agütsütsü temeden meshia jaja aser yangji ajemdaker International Women's Day ya amunger ta ashi.

Iba sentong nung Ruth Bodo Kachari-i sarasadem aser Lotha community ajanga temeja ken ka aten aser HCCWA ketdangsürtemi asayamenü ka agi shilem agia liasü.

Nagaland Legislative Assembly nung firecrackers ken o jembia

Dimapur, Metsüremi/March 09 (TYO): Nagaland nung firecrackers azüoktsü onük 14th Nagaland Legislative Assembly indang Session ti buba March 9, 2026 nü benoka liasü.

Iba anogo MLA Nuklutoshi-i kechiba iba tenokdangba ya Diwali mapangbo amshir saka Christmas aser New Year benjong mapangbo mamshir ta asüngdanga liasü.

14th Nagaland Legislative Assembly indang session ti buba tenzükler ananü buba nung Nuklutoshi-i firecracker yagi mokozü tamajung adokdaksür, koba ajanga shirangdaksür aser nisung kisüng masü shiruru tema timtemdaksür, ta ashi.

Firecrackers amshiba ajanga mopung aser ola menentsür, tango sashiba nung kongshir, arem shiruru aser kiset shiruru takum nunga kongshir, ta pai ashi. Anungji state nung benjongbentsü balala nung tenokdangba balala agütsüba tetetzü kechi lir ta

asüngdanga liasü. Iba tasüngdangba langzüdang, linük nung firecrackers amshiba ya Supreme Court of India ajanga totuyuba agütsüba ama lir, kong conditions tejangja kar kübok amshitsü melar, ta Deputy Chief Minister Yanthungo Patton-i ashi.

Item nungji certifies green crackers, mapang telatet amshiba aser 'noise and pollution standards' tatakzük agüja aliba sülen anidakba dena lir.

Item guidelines sülen anidaktsü atema state sorkari mapang shia aser talisa benjongbentsü mapang totuyuba balala agütsür, ta pai ashi.

Dy.CM-isa CSOs aser nüburtem dang benjong mapang nüburtem, shiruru aser libajen nung timtem magütsütsüsa benjong amungtsü atema ketdangsür temi totuyuba agütsüba nung anidaktsü ayongzüka liasü.

DTE-i AI indang faculty workshop ayongzük



Dimapur, Metsüremi/March 09 (TYO): State nung aliba Government Polytechnics nung tesayurtem asoshi asemnü Faculty Development Module on Artificial Intelligence (AI) indang workshop ka Directorate of Technical Education (DTE), Nagaland ajanga DTE Conference Hall, Kohima nung March 5-7, 2026 anogotem ayongzüka liasü.

Director, Technical Education, Er. Vipulhou Lhoungu-i pela agizükba o jembidang iba workshop nung shilem agirtem temulung agüja training nung adentsü aser academic background balala nungi süaka Artificial Intelligence amala technology kanga kera melenshiba sülen anidaktsü ayongzüka liasü.

Iba sentong nung state tesem balala nung aliba Government Polytechnics tem nungi tesayur

18 dena liasü, kong technical sessions mapang shisalen sayur ya Senior Full Stack, NET Developer, Euphoria GenX, Kolkata nung Cloud and Database Specialist & Technical Trainer, Debasish Sahoo liasü.

Asemnü sentong nung shilem agirtem dang AI platforms aser tools balala anogoshi amshiba indang angazükdakja liasü.

Item sessions mapang tesayur nem AI tools aser methodologies amshia polytechnic institutions nung kaketshirtem dang sayuba yimyatem angazükdaksü.

Iba workshop tembangba sentong nung Joint Director, Er. David Tsela-i jembidang, tesayuba aser research nung AI tools amshitsü aser technologies tajungtem maneni bushia amshitsü ayongzüka liasü.



Tetsür temi timtem ajangshiba angadanga metongshiba maparen inyaktsü asoshi National Commission for Women ajanga linük ajanga nung ayongzükba Mahila Jan Sunwai sentong Deputy Commissioner, Tseminyu indang Conference Hall nung March 9, 2026 nü agia liasü.



March 09, 2026 nü New Delhi nung External Affairs Minister, S Jaishankar-i Rajya Sabha senden nung jembidang tangokba noksa nung angur. Parliament nung Budget senden tanabuba shilem Hombarnü tenzükogo.

Jaishankar-i Parliament nung West Asia tensa osang metetdaksü

New Delhi, Metsüremi/ March 09 (Agencies): Hombarnü Rajya Sabha senden nung External Affairs Minister, S Jaishankar-i tang West Asia nung rara adoka aliba dak sendakba nung tongmelang agi sangdong ka agütsüogo.

Jaishankar-i, Ato kilonser Narendra Modi-i West Asia nung tensa mejungi aliba mita dang repringdar; iba rara ya talisa India atema tebilemtsü onük tuluka lir, kechiyong Gulf region nung India nung aika mapa inyaka lidar, ta metetdaksü.

"February 20 nü sorkari sangdong ka ajanga tebilemtsü akaba lemsatopogo aser telok ajak dang atsü-anem akatsü ajungshiogo. Tensa tamajungba makümtsü atema ken o jembiba ajanga mangatettep bentettsüla ta India-i shiogo," ta pai metetdaksü.

"Iba dak alia region nung kin ka nija tashiji ajaki akhümtsübütsüla," ta pai ashi.

Ato kilonser Modi leniba nung amenba Cabinet Committee on Security senden nung iba tensa indang jembioigo aser Gulf region nung aliba India nungertemi timtem balala ajangshiba tebilemtsü lemsatopogo, ta Jaishankar-i metetdaksü.

"Ato kilonser Modi-i UAE, Qatar, Saudi Arabia, Oman, Jordan, Israel aser Bahrain linüktem nung tekolakpurtem den jembioigo. Onoki ajak dang tensa süngjemtsü atema inyaksü ajungshir," ta Jaishankar-i metetdaksü.

"Iba rara ya talisa India atema tebilemtsü tuluka lir,

kechiyong Gulf nung aliba linüktem nung mapa inyaka alir India nung crore 1 jungnüa lir. Iran nunga India nung kaketshir aser mapa inyaktertem meyirjang ishika lir," ta pai metetdaksü.

Parliament nung EAM-i sangdong agütsüba sülen opposition INDIA teloktep nungi züngsemtemi Parliament temeket nung aliba Makar Dwar nung longkak aita sorkar anema yimiyim ayima liasü.

Longkak aiter MP tem jagi, "Gulf rongdar, totzü agi anünger. India nung meküzmükteter. India-i lenir nüngdaker - ola madokba masü" ta ozülü ka amer liasü.

Opposition MP temisa, "Opposition ola madokdaksüba ya democracy tepsetba den kasa lir," ta metetdaksü.

Osangbenertem den jembidang Jairam Ramesh-i, minister-i sangdong agütsüba dak sendakba nung tasüngdangba asüngdangtsü atema opposition nem maongka magütsüba agi opposition-i longkak aita senden nungi ayazüka alu, ta metetdaksü.

Hombarnü Jaishankar-i Parliament nung West Asia tensa indang metetdaksütsü lia Congress-i, opposition-i Parliament nung West Asia tensa atema o entepner, ta metetdakja liasü.

Hombarnü Parliament nung budget senden tanabuba shilem tenzüktsü jelia Rajya Sabha nung opposition lenir, Mallikarjun Kharge indang takdang nung opposition party balala nungi lenirtem senden ka ayongzüka amen.

Amongnü aonung Congress general secretary in-charge communications, Jairam Ramesh-i X ajanga, "External Affairs Minister-i Parliament House anaprongla nung West Asia tensa atema sangdong ka agütsütsü. Timtem kaji- item ama minister tem sangdong ajanga meteta aliba osang dang metetdaksür. Tongtibangüsü osang metetpelatsü mesüra asüngdangtsü atema MP tem nem maongka magütsür," ta metetdaksü.

Paisa, "Opposition-i iba onük nung o entepner," ta metetdakja liasü. Ano opposition aitsüba olen ka nung BJP MP temi, West Asia tensa nung ajemdaker Congress-i aniba opposition-i senden nung timtem agütsür, ta aitsü.

BJP MP Sambit Patra-i, "Tanü anogo latetogo: March 9 nü kodang senden tenzükdir Bharatiya Janata Party, NDA teloktep nung alirtem aser opposition-i iba onük nung o jungjunga lemteptsü liasü. Tanü Congress Party aser opposition-i ano tanga onük ka, bangzüng ka dang benok. Parnoki senden magitdaksüner; iba ya linük nüburtemi repringdar," ta metetdaksü.

BJP MP Ravi Shankar Prasad-ia, iba onük nung o enteptsü atema sorkari melunga dang lir, aser telangzüba ajak agütsütsü, ta metetdaksü.

Paisa, "Iba onük nung o enteptsü atema anogo ana lezmükja lir. Rahul Gandhi lenisüba kübok Parliament akhümket mezüngshir mesüra Speaker menden mezüngshir," ta aitsü.



March 09, 2026 nü Chief Election Commissioner, Gyanesh Kumar-i Kolkata nung Kalighat Kali tekülem ki semdangba mapang tangokba noksa nung angur. Pai iba tekülem ki semdangba mapang nung telok kati pa dang wako tanak sayua 'meyipa oadokang' ta yimiyim ayima liasü.

MP/MLA tem shilem 10 dang tetsürtem lir: ADR

New Delhi, March 09 (Agencies): Tang India nung MP tem aser MLA tem 4,666 lir, aser iba nungjagi tetsür MPs/ MLAs 464 dang lir aser ibaji shilem 10 dang lir, ta Association for Democratic Reforms (ADR)-i metetdaksü.

"Women's political participation & representation in India" ta ajaba report ya Amongnü International Women's Day anogomong nung ADR-i sangdonga liasü.

ADR aser National Election Watch (NEW) nati renemba report ajanga ashiba agi, 18buba Lok Sabha nung MP 543 nungi tetsür MP 74 (shilem 14) dang lir.

States aser UTs 22 nungi tetsür MP tem lir, aser tetsür MP ka danga maliba state ji Kerala dang lir, ta kasa report ajanga metetdaksü.

Tetsür MP tem teimba aliba state ji West Bengal lir (MP 11); Uttar Pradesh nungia tetsür MP 7, Maharashtra nungia tetsür MP 7 aser Madhya Pradesh nungi tetsür MP 6 lir.

Party tem sasep nung tetsür MP tem teimba aliba party ji BJP (MP 31) lir; Congress nungi tetsür MP 13 aser Trinamool Congress nungi tetsür MP 11 lir.

National party aser state party tem nungi tetsür candidate temi MP election nung takok angur. Recognise masüba

yimtenren party mesüra independent candidates tetsür shingai takok mangur.

Linük nung MLA 4,123 lir aser iba nungji tetsür MLA 390 (shilem 9) dang lir.

States aser Union Territories assemblies nung tetsür MLA teimba aliba state ji Uttar Pradesh (MLA 47) lir. West Bengal nunga tetsür MLA 40, Bihar nung 29 aser Madhya Pradesh nung tetsür MLA 27 lir.

Party tem sasep nung tetsür MLA teimba aliba party ji BJP lir (MLA 163), iba sülen tanabuba aser tasembuba jenjang nung Congress (59) aser Trinamool Congress (34) na lir.

1951 küm Lok Sabha nung tetsür MP 22 liasü aser 2024 küm nungbo tetsür MP 74 liasü.

2023 küm September ita nung Parliament nung Women's Reservation Bill 2023 agizükogo. Iba ozüng ajanga Lok Sabha aser state assemblies nung tetsür nem menden shilem 33 shiteta yutsür, ajisüaka tang tashi iba ya mapa küma mebenoker.

2026-27 küm census agiba sülen 2029 küm general election nungibo tetsürtem nem menden shilem 33 lezmükja aliba ya k e t d a n g s e r t e m i metetdaksüogo.

Party temi Bengal nung election shilem ka-ana dang lemsar agitsü mepishir

New Delhi March 09 (Agencies): West Bengal nung assembly election agitsü mapa ana nung lia Hombarnü BJP aser CPM nungi lenirtemi Election Commission dang Bengal nung assembly elections ji shilem ka mesüra ana dang lemsar agidaksüner, ta mepishioigo.

Party ana nungjagi lenirtemi Chief Election Commissioner, Gyanesh Kumar dang election mapang talangka atsülanga magitsü mepishi.

CEC ajuruba sülen osangbenertem den jembidang BJP lenir, Shishir Bajoria-i, "Assembly constituency 294 prongla nung election ji shilem ka-ana dang lemsar agitsüla ta onoki jangjangja shiogo," ta metetdaksü.

Paisa, "Tesüiba mapangtem nung shilem tenet-ti lemsar elections agiogo, aser ibaji ajanga tajangzüke kecha mangur," ta metetdaksü.

CPM state secretary Mohammad Salim-ia, "Party-i

election ji kenüyongi dang agitsü mesüra shilem ana dang lemsar agidaksüner. Kodang shilem aika lemsar election agidir kasa administration aser kasa ozüng alema inyaktertemi asalentong yanglutsü atema mapang peria angur," ta ashi.

Paisa, state nung agiba special intensive revision (SIR) ya nüburtem anema inyakba mapatong ka liasü, ta metetdaksü.

"Electoral roll renemba mapang nung kechiba election commission-i nüburtem jashidaksü? Voters lakh 60 agienba ajanga election mesüra voter list ji tejakleni moutettsü," ta pai ashi.

Bengal nung tesüiba küm aika election shilem aika lemsar agia aruogo, ajisüaka election mapang ozüng alema inyakba mapatem menokdangteter.

2019 aser 2024 kümtem Lok Sabha election-a shilem tenet lemsar agia liasü aser 2021 küm assembly election-a shilem 8 lemsar agia liasü.

PUBLIC NOTICE

ICICI Bank Registered Office: ICICI Bank Tower, Near Chakli Circle, Old Padra Road, Vadodara- 390007
 Corporate Office: ICICI Bank Towers, Bandra-Kurla Complex Mumbai 400051

GOLD E-AUCTION DEN INVITATION NOTICE

Tsünglanglen shia aliba sen apurtem nem notice agüja gold ornaments facility ("Facility") ajanga ICICI Bank Limited ("ICICI Bank") dang agiba sentsüh agüjang ta metetdakja liasü. Onoki pledged gold ornaments ji March 20, 2026 nü E-Auction asütsüsa akümer, kechiyong pamoki sentsüh magütsütet. Jelia memetdaksü account agientsü/E-Auction anogo melenshitsu atema ICICI Bank dak tashi lir. Auction ya online ajanga- <https://jewel-auction.procuretiger.com> nung nikongdang 12:30 ako nungi nikongdang 3:30 ako tashi agitsü. Telatetbatem aser osang tejangja atema agüja aliba website nung repringang. Sen apurji süadoker süra telatetba ajakji senmangertem dak benshitsu.

Loan A/C No.	Customer Name	Loan A/C No.	Customer Name
Branch Name: Dimapur		Branch Name: Lanka	
047662001364	Philip Kez	211462001314	Sahabuddin Tapadar

Date : 10.03.2026
 Place : Dimapur

S/d Authorised Officer
 For ICICI Bank Limited



TIR YIMYIM YIMOBILEM (EDITRIAL)

DIMAPUR TUESDAY, FEBRUARY (METSUREMI) 10, 2026

MMC-i tatishitsü tajung sayuogo

Mokokchung town nung shishilembar aser nungdak jartem gari khen anena ayuba atema 'Parking fee' terara saruba nungi Mokokchung Municipal Council (MMC)-i par yimten kübok aliba mepu, ward, 18 prongla nung kima yimdong nunga aonung agi anungdang küma sangwatsüsa 'street light' enoktsüba mapa ya tanü putu nung Naga nungertem tsungdang samaniba, pioneering, mapa ka asütsü. Nagaland nung tanga Municipal yimtena lir aser kasa saru sarua bendener saka item saru jagi item Municipal tesemtem nung inyakba mapatem indangbo tangashia kecha mangashi aser tangua kecha mangu. Aji oda, Nagaland nungsa kasa Municipal council-sa süaka tangarbo inyakertem nem ita sen magütsütetba timtem ajuruba agi yimti yimdonga junga mouktet timtemba angashidang, Mokokchung Municipal Council purtemibo pei sasep nung sarutetba sen tera agi aika küma yimti topur jungdaksüba dang masü saka nübortem anisungzüksüsa nungdak mapa tajung inyakbaji, Mokokchung nung alirtem asoshi dang masü saka alima nung alir Aotsür Aor ajak asoshi nümadangtsü mapa ka lir. Iba ama nübortem dang nungi saru sarudenba sen agi nübortem asoshi mapa tajung inyaktsüba nungji tenük agi anguba terenlok mapatem dang nung jagibo, ano, tenük agi manguba ochi, teindang aser terajem shisatsüjisa topur tajungba aser jenjanga tuluba lir. Asenoki aiben asenok ya samanir kin ta asüba ya asen tsüraburtemi mezüng Tsüngrem temeim agizükba aser mezüng azüng zülü metetba nungi tenzüka maparen tajung aika nung tangar dang nungi tama tongtetba aser inyaktetba mapatem agi ajar ta angateter, anungji tanübo samanir asütsüsa joko lenmang mali amai asenoki bilemer. Iba jagi tanü asenok ya akhi tsüraburtemi inyakba konang nungsang madak tsungsangertem lir. Ajisüaka, ajak atema tagitsüjibo akhi tetsü teboutemi inyaktetba konang nungsang mapatemji masü saka tanü alirtemi kechi inyakteter ta asübaji asütsü. Asen tsüraburtem takar asüba agi asen tenungbo takar tenung asütsüa akok, kasaji asen tsürabur nokinketer asüba agi asen tenünga nokinkeker asütsüa akok, saka tenungbo takar saka asenbo sensaker, tenungbo nokinketer saka asenbo lapi ta süra, asenokji pongmang lima nung alir amai lir. Yangji tagitsü kecha mali. Aji oda, tanü asenok samanir kini anir nübortem meyong agi pei meyong akümba aser nübortem dang nungi saruba agi pei akatsü merangba putu mapang ka nung, kecha meimlaika, Ao lima nungi Mokokchung Municipal Council-i nübortem dang nungi saruba sen agi nübortem asoshi inyaktsübaji tanü alima aso 21 buba nung Ao kini pitetba samaniba lenmang, Pioneering path, tasen tajung ka asütsü. Iba mapaji ajizüka, asüng nungi tanga Municipal aser Town council-temia inyaka aotsü imlar. Atangji, tang tangbo Nagaland nung Municipal-sa asüyonga Mokokchung Municipal Council-i sarutetba senji tanga Municipal council-tem nung sarutetba dang nungi kanga agi tajemba asütsüa akok, ajisüaka senji aika mesüra ishika sarutetbaji masü saka tamshirtemi shitak indang-indanga amshir asü mamshir ta asübajiang tongtibang lir. Aji oda, MMC-i tang mezüng par yimten kübok aliba tesemtem nung nübortem nungdak reprangteta 'street light' enoktsübaji nungdak shitak ka reprangteta inyaktsüogo. Yimti nung 'street light' ya aonung tesangwa asoshi dang masü saka iba jagi yimti topur jungdaksür. Iba tangatetba nung tanga limatem nungbo yimti nung kiyong aser mepu shia tetokteper amai, street light jagi tesangwa agütsübaji dang masü saka light yindong agi naro küma 'design' tapu balala yanglur azünga angutsü. Iba ama mapa tajungji asenokia tangar dang nungi reprangzüka asen lima nung inyak tenzükra, atangji, nisung tajung kümdaksüba mapatem nung dang masü saka alima topur jungdaksüba mapatem nunga tanü asenok tangar kintem rongnung samanirsa asütsü. Atangji, MMC-i Parking fee saruba sen nungi street light enokba mapa kisung jagi Ao kin ochi dangi meyipba 'Pioneering' lenmang ka piteta sayuogo. Iba jagi asenok ya Pioneer kin masü, Pioneering kin lir ta angatetdaksür.

OLEMSABANG

NISUNGI TSÜNGREM TEBILEMBA TONGTETSÜMAKOKER

~ M. Meren, Ex.pastor Ungma.

(Yashi adok nungi...)

Hauni Chumukedima Arogopur asoshi tang masü saka Aoli ajak asoshi mang yimera manentettsüka atalokaogo na? saka Spafforder kibung nungbo aiür tajung pezü kenyonji dang samaba ajuru nung tebuibo tanü tashi asenok molung süngzüka atentsüsa tang ken ka mejemtet masü no? Asenok nembo temangbo ajak agütsü saka Spafford-er jala pezübo kujang ka mungutet sama, jala pezü leper maka. Jala pezüji tekümtet tejangja akaba taküm liasü, süra kechiba Tsüngremi meküzmzüktet ta süngmanger, anungji nisungi Tsüngrem tebilemba tongtetsü makoker.

Saka item ajak ajateta aki putu nung kibung kati tansütsü ka ajurua lir, aser aji Yober kibung, par kibung nungbo kenyonji tang jala japaso ter tashi yipru agi züksettsüba atalok masü no?

Asenok meimchirtemi Tsüngrem sentong angatetsü kanga tasak, tanü asen tendak atalokba ama tangar daka ajungben lendong aika ataloker ajioda asenok Tsüngrem tenzükertem dak kasaji jenti ataloker, küm ishika jakdang ABAM Secretary tasen melentsü sentong nung atentsü arur asen Aor Pastor ka len tom nung cari nung tsükseta asüba matalok no? küm ishika jakdang tangar kin ka par Mungdang Ex.Secretary mungdangi aor cari nung tsükseta asüba matalok no? küm ishika jakdang CBCNEI general Secy. Aini aor cari ka nung tsükseta asüba matalok no? parnok ajakji pei menenyong atalok ta shibai shitetsü? anungji alima yabo par par ta kecha mali ajak dak tasüba balala ataloker missionary aika tayimtsü nungi tsükseta asüba atalokaogo, cari nunga tsüksetba atalokaogo, asen lima nunga Tsüngrem tenzüker cari nung tsükseta asüba ajuruogo aser aji aseni meteta lir, anungji alima nung Tsüngrem sentong angatetsü kanga tasak aser satan sentong nungi asenoki aiben mejenboteter aser pa nem tepsetdaksür, saka item ajakji alima nisungi ajurutsü mapatem lir.

Küm ishika süiaogo America lima New York yimti nung amendaka aliba World Trade centre Building talang nung ft 1368 tasa, ibaji sünga shishilembar tulu tila aser dokan alima ajak nungi bendenba osettem aser nisung tulu tila sünga mentepba liasü, iba Building dakji ashirtem kari tayimtsü nung mener arua iba Building dak atsüdang mi atoka metsürepba laoa rongdokba to bilemteter südi? Iba Building nung aliba nisung 2996 minuts ishika nung rongset, parnok ajakji temenenpurtem temeja liasü asü? Parnok menenyong rongset asü? Tanü iba kimong nungji menomen tesüngmangtsü tajung ka yanglua lir, aser tasürtem 2996ji iba menomen dakji Yongmen yin agi tenung ajakji zulua lir, parnok tenung yongmen yin agi zulua akaba amaji parnokjia aika Kotaker taküm kakat nung zulua lidi koda? Ni ibaji ajia senzüdang nüktzü yima temolungjang agi metongi bilema jajaogo. Tanübo iba World Trade centreji iba anasaji kanga agi talangba tasa nung ft.1792 yangluteta lir.

Mapang ka nung Siloam tesem nung longki kilem kolak ka kozüka tsükdang idakji alir nisung 18 tashi tepset, ashiko tera tera yirurtema aika liasü südi saka atanga asüba nisung 18 tashi asü, idangji nisungtemi parnokji temenenpur temeja liasü südi ta bilem saka Yisu kechi ashi? Nenoka temulung memeyipra yamaji samatsü ta langzüba angur, Yisui hau taka mashi nungataka mashi saka nisung shia bilemdangtsü onüktang ka ashi. anungji lentong ajurua asürtemji para par menen agi asürtem ta shibai shitetsü? Yisui yamaji ajak dak ataloktsü ta ashiba angur.

(Maneni asüng adok nungi...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Nigeria nung kiralongrartem aika sayutsüngeritem kümogo: YWAM



Nigeria nung taoba mapang kiralongrartem baptiba sülen tangokba noksa nung angur.

March 09, 2026: Nigeria nung kiralongrartem aikati Yisu Khrista agizüka tangbo Khrista atema tanela tongbang raratsür sayutsüngeritem kümogo, ta Khristan telok Youth With A Mission (YWAM)-i metetdaksü.

Ano Nigeria linük nung kiralongrartem aser ozüing alema inyakba telok balalai kinüngburtem aika tepsetba ajanga amitsür kümer alirtema aika tanela nung taneptsü nguogo; Tsüngremi temenen mapa inyakeritem taküm melenshija Pa sentong ataloktsü atema amshir, ta YWAM-isa metetdaksü.

Africa nung nütsüing teimba aliba Nigeria linük tesem balala nung kiralongrartem aser ozüing alema inyaker telok aika alidak YWAM-i ministry training center aika amenoka lir.

Tesüiba küm aika Nigeria nung Khristantem kanga reshikangshia arudar, aser ibaji ajanga tawa US Tir, Donald Trump-i Nigeria ya "country of particular concern" (CPC) linük, ta sangdongba den külemi kiralongrartem anema raratsü atema training agütsütsü asoshi America nunger sepai aika yokogo.

YWAM-isa Nigeria linük nung missionary temi Tsüngrem yimli yangertsü atema mapa jenti inyakba metetdaksü.

YWAM-i adokba film ka nung kiralongrartemi Yisu Khrista nem taküm bendanga agütsüba taküm kulitem densema lir.

YWAM-i adokba film 'Go Africa' nungji Nigeria nung kiralongrartemi tekolak tangzüka lepsetba pastor tem kinüngtsürtem nem-a tetushi agüja lir.

Counselling atema Khristan amitsür 150 shi ita trok shia khen YWAM base centre-i arur.

Iba film nungjisa tashiyim amshiba aser satan külemba indang lir aser yimti ka nung YWAM mezüing amenokba

indang lir.

Tawa iba film yai continent trok kübok tesem 240 nung sayaogo.

Osangbener den jembidang tetsür missionary kati, küm shia alima nung Khristantem tepsetbaji shilem tesadangka nungi teimbabo Nigeria nung tepsetba lir, ta metetdaksü.

Nigeria tsür Khristan kati, "Boko Haram züngsemtem tesem ajaklen lir. Parnoki yimtsüngtem amaker. Teburtem tepseter aser tetsürtem puer aoer. Arrshi küm 10-11 tetsür chanutem aika tetsütem kümogo. Anungji tang iba film ajanga item ama osang tejangja sangdongba atema pelar," ta metetdaksü.

Nigeria nung YWAM base amenoker Paul Dangtoudma-i, YWAM staff tem shilem asemsü nungi anabo taoba mapang kiralongrartem lir, ta metetdaksü.

Paul ya Burkina Faso toktsür Nigeria-i oa tenzüker lenir ka lir.

Paul-i, "Iba tesem jagi aotsü atema Tsüngremi onok jatetba mapang nung tesem ajaklen rara liasü. Yangi nisung jenti samaogo. Yimtsüing aika samatsüogo. Lanurtem aika süadokogo. Tesem ajaklen tensa mejungi liasü," ta metetdaksü.

Mezüngbo Paul kinüngtsüü jalatem anir iba tesem jagi oa tenzüksü memelungi liasü, ajisüaka tesülen la melung melenshi.

Paul kinüngtsü Rachael Dangtoudma-i, "Tsüngremi kü melungjang melenshitsü aser Nigeria nung tenzüksü atema kü den jemi," ta metetdaksü.

Pei taküm dang masü saka jalatem taküm-a samatsü metsübu Paul aser pa kinüngtsü nati tamalen kiralongrartem amenoka aliba aser mojing külemba tesem ka nung discipleship training school (DTS) ka amenok.

"Parnoki (Boko Haram) 'jihad' rara ayonger. Parnoki nisungtem kangshia Islam

yimsü dangi meyipdaksütsü meranger. Reshikangshia ajangshirtemji Khristantem dang masü saka Muslim nungertema aikati reshikangshia ajangshir," ta Paul Dangtoudma-i metetdaksü.

"Arogotem aika anema inyaker aser pastor tem jenti tepsetba ajanga kinüngtsürtem aika amitsür kümogo," ta Rachel Dangtoudma-i ashi.

Laisa, tetsür karbo parnok chirnurtem aser kinüngburtemi repranga lia tashiyim amshia raksatsü. Kiralongrar ka kijai nisung 200 dak tali tekolak tangzüka lepset, ta ashi.

Paul-i tesem aika semdanga pastor kinüngtsürtem densema amitsür 6,000 dak tali ajuruogo. YWAM ministry-i item ama amitsürtemji tushia tenzüker.

YWAM indang DTS school nung graduate asür kabo tang England nung lawyer inyaker, kar pastor inyaker aser ministry balala nung tenzüker.

"Alima tesem balalai oa Khrista osangtajung proktsü atema Tsüngremi Nigeria nunger aika aniteter," ta Rachel Dangtoudma-i metetdaksü.

Paul-i Khristantem dang Nigeria atema sarasademjang, kechiyong alima nung temelenshi tulu adoktsüsa Africa continent dak tashi lir, ta metetdaksü.

"Nigeria-i alima nung mapa tulu inyaksü. Yang nungi missionary tem jenti alima tesem balalai yoktsü. Nigeria nung temelenshi adokdar aser Yisu nütsüing akümtsü atema Nigeria ya tatishitsü ka asütsü," ta Paul Dangtoudma-i metetdaksü.

YWAM tenzüksang, asür Loren Cunningham nem tetushi agüja iba film ya par jabaso David L. Cunningham-i direct süa yangluogo.

Khrista osangtajung atema pei taküm bendanga agüja tenzükeritem nem tetushi agütsütsü nukjidong nung temelungertemi tenla agüja iba film yanglu.

ANO GO ABEN TSÜNGREM DEN

Asen chirtem anepaluba

Tila tanurtem kü dangi arudakjang, kechiyong Kotak yimli ibala meyong lir.

- Mark 10: 14.

Mapang ajak nung asen taküm teinyaktsü mapa tulutibaji Tsüngremi asenok nem agütsüba tanurtem anepalutsübaji lir. Alimai taküm tasen ka bener arutsübaji asenok asoshi maongka koda tulu, iba temoatsü den asen teinyaktsü koda tulu lir! Iba mapa dang tuluba asenok. asoshi tayongzüka mali. Asen kibong den mapetba tashi aikati kibongji amaker, tanurtem tsürabur nungi piladaksütsü meranger, mozü aser TV ajanga parnok shisatsü aser temang menentsür aser kinük ajak nung mapa tamajung inyaktsü sayur. Kibong raksaba aser apuani balaba ajanga tanurtem shisatsü süngjema melidaksür.

Tanü Lai jagi tanurtem nüngdak tulutiba sayur, koba asenok asoshia tulutiba lir. Yisu Khrista dangi arutsüba Temeshi Baptiba ajanga Pa temeim asenok nem meküploksür, tamang aser tekümtet bener arua Tsüngrem yimli nung züngsem kümdaksür aser Pa ajanga taküm tepiyong Pa o agi tamang nung ainer aser Khristan tsüraburi aser tangari anepaluba ajanga aseni Tsüngrem temeim meteta akümer. Asen O aser mapa ajanga temeim jungkai adoktsür, sarasadem ajanga temeim moshia ayimer.

Iran nunger Khristantemi pei linük atema lumia sarasademer

March 09, 2026: February 28, 2026 nü United States aser Israel nati senteper Iran amak tenzüka sülen nungi Iran nunger Khristantemi Iran nung yimsü temeden alitsü aser tensa tajungba akümtsü atema sarasademer.

Iran nung tongti lenir Ayatollah Ali Khamenei tepsetba sülen nungi bendanglen aliba Iran nunger Khristan ministry balalai Iran nung aliba Arogo den tongtepretep mesüteter.

London nung amenoka aliba Iranian religious freedom advocacy organization Article 18 director, Mansour Borji-i tang tashi nung Iran nung aliba Khristantem dang nungi osang kar dang ngutetogo, kechiyong iba linük nungji internet nokdanga lir.

Borji-i, item osang teimbaka pelaba osang masü saka kijai yimsüsüba anentsü atema Khristantemi imlaba osangtem lir, ta metetdaksü.

Borji-i, Khristan karibo tarutsü atema shisabuluba lemsatepogo, ta metetdaksü.

Iran tsür Khristan kati, "Iba tashi ya tanur asodang ashiba

amai lir. Ajisüaka kobi meli taküm tasen angutsü aser talenba nungi salatsü atema onoki sarasademer," ta metetdaksü.

Laisa, "Yimlibilema maneni sarasademjang, kechiyong yangi aliba nüburtemi teimla nüngdaker. Yangi aliba nüburtemi tekümsüka ka lir, ta metettsü nüngdaker," ta metetdaksü.

Osang angazükba agi, tang Iran nung jail tamajungtiba Evin Prison nung Khristantem aika puoka lir aser tepuokdak alirtemji tanga tesem kati anir ogo.

Iran nung rara tenzüka sülen Iran nunger Khristantemi lumia sarasadema arudar; parnok linük nung temeden balala, yimjung aser linük tekümtet atema sarasademer.

Iran tsür Khristan Behzad Mary-i, "Iran nung tarutsü teimla tasen ka tenzüker. Tsüngremer mapangji tetemsü," ta metetdaksü.

Laisa, talisa Iran nung Islam yimsü toktsür Khristan yimsü agizükertem atema sarasademjang, ta mepishia metetdaksü.

AO OSHI ANGAZÜKDAK:

TANÜ ANGAZÜKTSÜBA OJANG



Wabong

(n) tebur teintet aser mapa ajak koka inyakba (title for respected man, mister)

* Yimti nung wabong tajung aliba agi mera aketer.

Wachen

(n) au terong tejen, aorong tejen (old bamboo grove)

* Wachen nungbo au tilala dang meyr.

OLONG PAITEP # 7438

Grid for crossword puzzle #7438 with numbers 1-17.

TIPLIN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S_ _ _ i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rüzüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 7437 TELANGZÜBA

TIPLIN :

- 1. Semtu, 3. Lepko, 5. Bilem, 8. Ulu,
10. Tsüngpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER



Maharashtra nung International Women's Day nung Guinness World Record tasen ka yanglutetogo. Iba ya Thane district nung tetsür aser school tanurtemi sobaliba tsüngsang Lezim aiba atema lir.

Mumbai anasa Dombivli nung aliba Shri Sant Savlaram Sports Complex ground nung Thane district kübok tesem balala nungi tetsür 9,111 adenshia Lezim tsüngsang külemi ai aser iba ajanga alima otsü tasen ka yanglutetogo.

Women's Day nung Manipur tetsür journalist tem tushi



Imphal, March 9, 2026

(Agencies): All Manipur Working Journalists' Union (AMWJU)-i March 8 nü Manipur Press Club nung International Women's Day mungogo.

Iba sentong ya "Give to Gain" omen nung ajemdaker amung aser media houses balala nung inyakba tetsürtem nem tetushi agütsü.

Iba sentong nung presidium members ka ama Transport Department nung Director Khumanthem Daina-i jembidang "tetsürtem tashi itdaksütsüba nung tetsürtem pusema nungitsüla" ta ashi.

Tesüba den medemdangra

tetsürtem jenjang tajungba kümogo saka loktiliba nung tetsürtemi tayongzükba balala ajuruba asoshi teinyaksü aika lir ta lai ashi.

Tetsür kati tim masüba nung shilem agiba putetra lai maitsü tajunglen agi sayutsüngitsüla ta Daina-isa ashi.

Iba sentong nung Manipur Police Training College nung Assistant Director Yengkhom Victoria aden. Laia o jembidang media ajanga tetsürtem dak kongshiba onüktem lemsateptsü ashi.

Tetsür journalist temi shilem tajungba agiba atema tenüngsang agütsür aser tetsürtem senotsü tsütsü nüjiso

alitsü nüngdaker ta Victoria-isa ashi.

"Tetsür shiai tayongzükbatem ajurur. Jenjang tajung nung aliba tetsürtemi jenjang tamajung nung alirtemi yaritsüla" ta laisa ayongzük.

Kümtem süia arudang media house balala nung tetsür aika mapa inyaker ta AMWJU nung Vice president Sonia Sorensangbam-i ashi.

"Küm ishika tejaklen media nung tetsür kanga ajema liasü, saka tangbo aika kümogo. Züngsem 450 nungi tetsür 60 shi lir ta AMWJU list ajanga ashir aser iba ajanga tetsürtemi media nung shilem tuluba agiba sayur" ta laisa metetdaksü.

Manipur CM-i United Naga Council den senden amen

Imphal, March 9, 2026

(Agencies): Manipur Chief Minister Yumnam Khemchand Singh, Deputy Chief Minister Losii Dikho aser United Naga Council (UNC) President Ng. Lorho nung senden ka menogo.

Chief Minister indang Secretariat nung senden amendang Manipur nung yimjung, tensa süngjemsü aser akhi ama arutsü indang onüktem lemsatep.

"Sorkari nükjidong atongtsü atema inyaktsü aser Manipur nung teti atema yimjung bener arutsü asoshi ajak renloktsü

tangatetba nung aotsü" ta Chief Minister Khemchand-i ashi.

State sorkari yimjung akangshitsü aser kin ajak tsüngda kati ka temulung lemteptsü, olemteptsü aser amaliteptsü asoshi inyaktsü ta pai nangzük.

"President Ng. Lorho-i anir United Naga Council teshimtet telok ka den ajurutepogo. Iba senden nung Deputy Chief Minister Losii Dikho aser tanga MLA tem aden" ta Chief Minister-i metetdaksü.

"Prime Minister Shri Narendra Modi lenisübai anir aser Sabka Saath, Sabka Vikas,

Sabka Vishwas tangatetba nung onoki Manipur longjemtsü, akangshitsü aser azükarutsü atema inyaktsü" ta paisa ashi.

UNC-i Kuki Inpi Manipur ama teloktem den külemi longjemmer tawa Ukhrul o Kangpokpi district tem nung atalokbatem densema ozüng alema inyakshangshiba aitsüogo aser yimjung alitsü ayongzükogo. Naga nung ali, yimtenren temeten aser maitsü nung masetshitsü ta UNC-isa nenshiogo.

UNC-isa Indo-Myanmar arrtsülen atsüdangtsü tebilemba magizükba metetdaksüogo.

Meghalaya footballer Sanfida Nongrum nem Rs 2 lakh agütsütsü

Shillong, March 9, 2026

(Agencies): Meghalaya Chief Minister Conrad K. Sangma-i footballer Sanfida Nongrum nem Rs 2 lakh teyari agütsü metetdaksüogo.

Australia nung AFC Women's Asian Cup 2026 asayadang Sanfida Nongrum-i India women national football team atema goal ka yoka liasü.

Nongrum-i kanga junga asayaba aser goal ka yokba ya la kija asoshi masü saka küm metsü sülen Asia nung tetsür football tournament nung India-i mezüng goal yokba otsü lir.

"Chief Minister's Special Grant nungi la nem senotsü teyari agütsütsü. Iba ya la ajungmesoba aser agizükba atema agütsür. Meghalaya'er jalai asenok nem konang



bentsür aruogo" ta Chief Minister Conrad-i ashi.

India tenüng nung senior international level nung Meghalaya nungi mezüngbuba asayarji Nongrum lir. Perth Rectangular Stadium nung India-i Vietnam den asayadang lai minute 52 buba nung goal ka yok.

Iba ya Women's Asian Cup

nung küm 23 sülen India-i mezüng goal yokba lir.

"Nongrum-i iba otsü yangluba ajanga Meghalaya aser Northeast nung football asayar putu ka ajungmesotsü. La takok ajanga Northeast nung saisapongtsü sempet tulu aliba sayur aser teküpoktiba jenjang nungi aniettsü angatetdaksür" ta CM Conrad-i ashi.

Longsa Pongen Kin-i Tetushi Agütsür



Teküboklen agüja alirtemi pei azüngba wadang aser NPSC tatidang nung takok tulu ngua kin nem tenüing tajung bener arutsüba asoshi Longsa Pongen Kin-i tenüingsang tetushi agütsür.

Dr. Alemtoshi Pongen, (S/o Mr. Pursanen Pongen & Mrs. Moasangla Jamir)-i Nagaland University nungi "Characterization of Biosurfactant from Hydrocarbonoclastic Bacterium and its Prospect in Remediation of Environmental Pollutants" onük nung Doctor of Philosophy degree takok ngua renemba asoshi.

Dr. Imnatila Pongen, (D/o Mr. Bendangtoshi Pongen & Mrs. Temjenkala Jamir)-i Indian Institute of Management (IIM), Ranchi nungi "Sustainable Closed-Loop Supply Chain for E-waste Management: A Multi-Method Approach" onük nung Doctor of Philosophy degree takok ngua renemba asoshi.

Mrs. Tsuktimongla Pongen, (D/o Mr. Pursanen Pongen & Mrs. Moasangla Jamir)-i tawa sangdongba NPSC CTSE, 2025 tatidang nung Pharmacist post mezüing jenjang ajangzüktetba asoshi.

Nükjidong tulu yur meranga zünger kin nem konang nüingsang bener arutsüba asoshi ner asem dang pelar aser ano tsürabur nema tenüingsang agütsür. Tarutsü nunga nenok wadang balala nung inyakdang takok aser temoatsü dendakjangma ta sarasademtsür.

Sd/-
Imtisunep Pongen, Convenor

Kin tenüing nung,

Sd/-
Bendangnungsang Pongen, Secretary

Bangladesh nung university tem shibangogo; totzü tatakzük dang ayoker

Dhaka, Metsüremi/March 9 (Agencies): Middle East nung mepetmesü adoker aliba ajanga totzü aser gas agi anünga akümba mapang Bangladesh-i university tem shibangtsüogo aser totzü tatakzük dang ayok tenzüko.

Ketdangsürtemi Hombarnü nungi tenzüka linük ajunga nung public aser jurila university tem ajak shibangtsü tenzüko, koba electricity aser totzü kümzüka ayutsü atema lir.

Ketdangsürtemi ashiba agi, iba ajanga electricity agiba tajemba kümdahtsüba dang masü saka gari senzusenpong tesademba kümdahtsüba aser iba ajanga totzü amajok nung entokba nungi kümzüksü.

Parnoki ashiba agi, university campus tem yagi residential hall, classroom,

laboratory tem aser air conditioning atema electricity aika agir aser item ya Eid ?al-Fitr holiday atema jelia shibangba ajanga linük power system nem anisüngzük agütsütsü.

"Alima nung tang tensa majungba apir electricity aser totzü atsükba tajemba kümdahtsüba atema iba telemtetba agiogo," ta Bangladesh indang Ministry of Education-i university ketdangsürtem nem osang agütsüba nung shia lir.

Sorkar aser nija school tem ajak Ramadan ita amungtsü atema shibanger lir aser iba tetezü linük nung ita tsüingda shiluyimdahtsüba timba shibanga atatsü.

Bangladesh ya energy atema tanga linük dak shilem

95 metaloker lir. Nüburtem totzü rizünga ayutsü atema aritepa totzü alitep tenzüka sülen sorkari Hokolbarnü nungi totzü tatakzük dang ayok tenzüko.

Electricity amshiba tajemba kümdahtsüba atema sorkarisa bendanger curriculum sülen anidakba school aser nija coaching centre tem dang iba mapang tsüingda inyakyim anena atatsü asüingdangogo.

Bangladesh nung gas agi kanga anüngba ajanga state meyong fertiliser factory pongu nungi pezübo inyaksangshi anenogo.

Riju balala kobika shibangtsü iba indang ketdangsürtemi osang tejangja magütsü, saka tensa tajungba kümra rijutem ya Eid holiday sülen tenzüksü imlar.

Iran supreme leader inyaktsü Mojtaba Khamenei shimogo

Dubai, Metsüremi/March 09 (Agencies): Iran-i taoba supreme leader Ayatollah Ali Khamenei melen par jabaso Mojtaba Khamenei shimogo, ta ketdangsürtemi Hombarnü sangdong aser kasa mapang Tehran-i Mideast nung totzü aser tzü indang facilities nung amakba tali kumogo, koba lisem limatem asoshi tongtipang lir.

US aser Israel nati Iran nung amak tenzüker hopta ka dak tema arur, aser iba linük indang Assembly of Experts temi par supreme leader tasenba ya kanga miimshia shim. Arishi küm 56 tain Mojtaba Khamenei ya linük indang paramilitary Revolutionary Guard den tesendaktep tajung lir.

February 28 nü Ayatollah Ali Khamenei tepsetba sülen Guard yagi Israel aser Gulf Arab linüktem nung missiles aser drones khalokja arur. Iba rara yagi alima nung energy markets anokshija totzü jenjang barrel ka nung sen \$100 dang timba kumogo aser Qatar-i natural gas production shibangba sülen supply kanga ajema kumtar.

Rara tenzüka sülen Mojtaba Khamenei ya yimjak nung mangu aser mangashi, aser iba mapa inyaktsü pa temesü ta mapang talangka

nungi züngshia arua liasü. Israel-i tebu metepsetdang aser sorkar mapa inyaktsü khen danga meshimetaka aikati pa dak teimla liasü.

Pa shimba nung mepelaba karbo lir amai ajiteteter. Iran telungzük nung yimten yimsüsür kari supreme leader nungja senmang ama agütsütsüba magizük, koba 1979 Islamic Revolution mapang laodaktsüba shah yimsüsüba ama asütsü. Ajisüaka Assembly of Experts nung putir lenirtemi Khamenei nem iba rara ketdangsüba mapa agütsünüa alitsü südi.

Khamenei ya tebu dang nungi tali hard-line ka ama züngshir, aser tang Iran indang armed forces aser Tehran indang nuclear sentong dak sendakba nung telemtetba pai agitsü.

June ita Israel-Iran tsüingta anogo 12 raradang United States-i bomb poklohtsüba sülen linük nung tongtipang nuclear sites tem raksatsür lir, ajisüaka Iran nung 'highly enriched uranium' lir, koba nok-nü yanglutsü mera tilaka dang lir. Tebui kodanga meinyakba Khamenei yagi inyaktsü akok. Israel-i pa dak tenük yoktsü shia lir, aser US Tir Donald Trump-ia Khamenei nem

yimsüsüba menden agütsütsü tebilemba aitsü.

"Nibo Khamenei'er jabaso magizükter. Iran nung yimjung aser tesunep bener aruba nisung ka ni aginer," ta Trump-i ashi.

Deobarnü ABC News den sensaksemba mapang, pai magizükba lenirbo mapang talangka melitetsü, ta Trump-i shia liasü.

Iran indang Revolutionary Guard aser Iran-i Lebanon nung yariba telungpur telok Hezbollah ajanga Khamenei bhukuma sangdong agüja liasü.

Iran security ketdangsür Ali Larijani-i Iranian state television den jembidang, Tehran nung tanen makai tayimtsü amshia amakba mapang Assembly of Experts tem tasü ita senden amenba asoshi tenüingsang agüja liasü. Khamenei tanubosang ya tebui training junga agütsür aser pai iba tensa ketdang sütettsü, ta pai ashi.

Israel-i Deobar aonung amakba sülen Tehran nung totzü ayuba tesemtem nung mokozü alonga lir. Iran-i US sepaitem aliba densema kidanger linüktem amakba asoshi Arab League tekolakbai kanga sashia aija liasü. (Maneni tapak 8 nung...)

OFFICE OF THE
SOYIM GAZETTED OFFICERS' ASSOCIATION
HQ.: UNGMA, MOKOKCHUNG, NAGALAND
Ref. No.SGOA/GEN-1/1996/2026-29-3 Dated: 07/03/2026

TENÜINGSANG AGÜTSÜR

Tawa sangdongba NPSC-CTSE, 2025 nung Ungma yimtsüing nungi takok angur nem SGOA ajanga tenüingsang agütsür. Association-i talisa tsüinglanglen agüja alirtem nem tenüingsang agütsür aser züngsem ama pelashishia agizüker:

- Ms. Mejungsangla Longkumer**, D/o Mr. Imtiangshi Longkumer, Medical Officer, Health & Family Welfare Department.
- Ms. Imtilemla Jamitsur** D/o Mr. Rongsenungba, Veterinary Assistant Surgeon under the Animal Husbandry & Veterinary Services Department.

Tsüingrem nem tenüingsang ajak agütsür aser Tsüengremi SGOA maneni moajangma.

Sd/-
(Er. Imtitushi Jamir)
General Secretary, SGOA

Office of the
MOLUNGYIMSEN SENSO MUNG DANG
P.O. Tuli, Mokokchung : Nagaland

TENÜINGSANG AGÜTSÜR

Molungyimsen Senso Mung dang-i tsüinglanglen agüja aliba jala anati takok tulu anguba atema tenüingsang agütsüba den yimkong asoshi konang bentsür aruba atema pelaba metetdaksür.

- NPSC-i ketdangsua agiba Combined Technical Services Exam 2025 nung Department of AH&VS nung Director Dr. & Mrs. Imo Tzudir'er jala **Dr. Akumna Tzudir**-i Animal Husbandry & Veterinary Services (AH&VS) kübok Veterinary Assistant Surgeon (Class 1 Gazetted) mapa anguba.
- Mr. & Mrs. Bendangyanger Nokdir'er jala **Kr. Alemienla Nokdir**-i School of Agriculture Sciences, Medziphema nung Department of Horticulture (Vegetable Science) nung Gold Medal anguba.

Tsüingremi jala ana taküm maneni len aniangma aser tena wadang moajangma.

Sd/-
N. Joseph Lemtur
President

Sd/-
B. Imsuinba Jamir
Secretary

यूको बैंक UCO BANK
(भारत सरकार का उपक्रम) (A Govt. of India Undertaking)
Zonal Office, T. N. Sarmah Path, Nehru Park, Jorhat- 785001, Assam

Tender No. UCO/ZO-JOR/2025-26/ET-011 Date: 07.03.2026

INVITING TENDER

Assam, Arunachal Pradesh aser Nagaland states tem nung Bank Premises indang Furnishing & Electrical Work atema Contractors empanelment asoshi UCO Bank, Zonal office Jorhat ajanga sealed tender meshir. Application ya 27.03.2026 nikongdang 5:00 ako tashi agizüktsü. Osang tejangja aser Tender Document download asütsü atema www.uco.bank.in. nung angutsü.

Dated: 09.03.2026 Zonal Manager

ALI TAYOKTSÜ LIR

AT KHEKHOKHU VILLAGE NEAR NAGALAND BAPTIST COLLEGE REASONABLE PRICE - NO BROKER CONTACT : 9612633017 / 9366303994

Kenya tzümetsüing lendong nung nisung 42 süogo

Nairobi, Metsüremi/March 9 (Agencies): Kenya kübok tesem balala nung anogo ishika tzümetsüing agi timtem agütsüba sülen nisung 42 süogo, ya sorkari metetdaksü.

Tzünglu kanga sashia aruba ajanga linük kübok tesem balala Hokolbarnü nungi metsünger lir. Kenya indang Public Service & Special Programmes Minister Geoffrey Ruku-i Deobarnü osangbenertem dang ashiba agi, police-i tzümetsüing lendong nung nisung 42 asüba mangaoka yuogo, kong linük yimtiba Nairobi nung nisung 26 asüba densema lir.

Police-i ashiba agi, hopta tatemi tzünglu agi linük kübok tesem timba ka dak kongshiba sülen tasüba ya county balala nung atalokogo. Tzünglu kanga sashia aruba ajanga lenmangtem metsüingba den senzusenpong nung tetsüdahtsü adokdaksü aser jila aika nung aogoshia

inyakyim nung kongshia liasü. Tzümetsüing yagi nüburtem libaliro aser infrastructure nung teraksatsüba aika bener arutsüogo.

Nairobi nung tzümetsüing agi lendem nung aliba tesemtem metzüng aser ayong moshia ayimba ajanga garitema aponger oa liasü.

Kenya Airways-i ashiba agi, tzünglu agi Nairobi nung tayimtsü senzusenpong nung tetsüdahtsü adokdaksüogo aser tayimtsü karbo Mombasa yimti-i yoktsüsa aküm.

Honibarnü tekümzükeritemi linük yimtiba nung tzü agi metsünger aliba tesemtem nungi tasümantem agitetogo.

Kenya tir William Ruto-i ashiba agi, tekümzüka maparen balala benoka inyaktsü atema pai sepaitem densema tekümzükeritem yokogo. Paisa, asür kinungertem den asükhu lemsatapa liasü. (Maneni tapak 8 nung...)

13 AR-i NWA wrestler tem nem tetushi agütsü



Takok anguba wrestler tem NWA ketdangsürtem, officials unit tem aser 13th Assam Rifles nungi ketdangsürtem sentong tembangba sülen Battalion Officer Mess nung tangokba noksa nung angur.

Kohima, Metsüremi/March 9 (TYO): Nagaland Wrestling Association (NWA) kübok provisional Units, Under 15 aser Professional category nungi wrestler tem nem 13th Assam Rifles, Kohima Battalion-i parnok idang camp nung tetushi agütsüogo.

Item wrestler tem yagi NWA-i ayongzükba 30buba Naga Traditional Wrestling Championship, 1buba NWA Under 15 Championship, 1buba NWA Provisional Championship nung takok tajung ngua liasü.

NWA Joint Secretary, Kuzhovesa Soho-i sangdong ka ajanga, NWA tir Vivolie Kezo-i 13th Assam Rifles dang kanga pelaba lemsatepa metetdaksü.

Kezo-i, wrestler aser ketdangsürtem tushiba asoshi 13th Assam Rifles dang kanga pelaba lemsatepa den battalion officer tem dang item wrestlers tem ya sports quota kübok Defense Service nung anioktsü atema takokba tashi lenmang bushitsütsü ayongzüka liasü.

Tetushi agütsüba sentong tatsüka agiba mapang 13th Assam Rifles Commandant, Col. Manoj Kujmar Singh-i, NWA-i parnok den teka amteper inyakba atema pelaba lemsatepa den takok angurtem pelashishia agizüka liasü.

Paisa, NWA asayamung tesüsabuba nung takok angurtem dang parnok tenüing tajung maneni tejakdangi bner

aotsü aser tangar asoshi nükrangdong ka ama alitsü ajungshia liasü.

Takok tajung ngutetba atema takokertem nem tenüingsang agütsüba mapang Singh-i, parnok tarutsü nunga takok tajung nguyonga aotsü imlaja ataba lemsatep. Pai takok angur parnok 12 nem sempet den kuli kakat agüja liasü.

Iba sentong nung NWA ketdangsürtem, affiliated unit 3 aser provisional unit 6 nungi ketdangsürtem aser 13th Assam Rifles officers temi shilem agia liasü. Iba sentong ya 13th Assam Rifles-i host süa chi chiyongtepba sülen tembangba liasü.

Cruzeiro aser Atletico Mineiro na asaya nung red card 23 agütsü

Metsüremi/March 9, 2026 (Agencies): Campeonato Mineiro nung Brazil nung club Cruzeiro aser Atletico Mineiro na asaya tatem mepetmesü tulu adokba sülen asaya tembangba liasü.

Mepetmesü adokba sülen referee-i red card 23 tashi agüja liasü, koba Brazil nung asaya puti otsü nung red card timtiba agütsüba lir. Belo Horizonte kübok Esadio Governador Magalhaes Pito nung iba asaya ya Cruzeiro-i goal 1-0 agi koka liasü.

Mineiro nungi Renan Lodi, Gabriel Delfim, Junior Alonso, Alan Franco, Hulk, Lyanco, Ruan Tressoldi, Alan Minda, Mateo Cassierra aser Angelo Preciado nung red card agüja liasü.

Kasa mapang nung Cruzeiro nungia Christian, Fabrício Bruno, Lucas Romero, Kaio Jorge, João Marcelo, Kauã Prates, Lucas Villalba, Cássio, Matheus Henrique, Wallace, Fagner aser Gerson nung red card agütsü.

Brazil nung taoba mapang asaya ka nung red card timba agütsüba 1954 kum club Portuguesa aser Botafogo na asayaba mapang red card 22 agütsüba ya liasü.

Iba asaya nung goal ka ya Cruzeiro nungi asayar Kaio Jorge-i idaktsü aser parnoki asaya tatem tashi kanga junga defend süa asaya liasü.

Asaya nung Mineiro keeper, Everson-i, Cruzeiro midfielder, Christian shiba goalie-i ball nokdangba mapang alangdaksür liasü, pa dangi o tamajung ashiba nungi mepetmesü ya tenzüka. Mineiro keeper yagi Christian ya alangdaksüba sülen pa nokdaksü lia oa o ashi tenzüka. Iba sülen Christian'er team mate tem arua Mineiro keeper longbang aser iba nungi mepetmesü ya tenzüka liasü.

Taoba mapang Brazil team nungi nungtugu asayar Hulk, shiba iba asaya nung asaya-a red card achirtem rongnung densema liasü, pai asaya tebur mejungi tembangba atema tatok meshia liasü.

Iraq coach-i World Cup play-off thinendaksüner

Metsüremi/March 9, 2026 (Agencies): US aser Israel nati Iran maka Middle East nung tensa mejungi kümer aliba mapang Iraq team iba ita tatemlen World Cup play-off asayatsü aliba ya team head coach Graham Arnold-i thinendaksüner.

Iraq team March 31 nü Mexico kübok Monterrey yimi nung Bolivia mesüra Suriname den asayatsü. Iba inter-continental play-off akokba team 2026 World Cup atema qualify asütsü, koba United States, Mexico aser Canada nung June 11 nü nungi tenzüka asayatsü.

Ajisüaka Iraq team nungi asayar aser staff tem iba asaya atema Mexico-i meyoctetsü akok ta shisabulua bilemer,

kechiyong kidanger Iran nung rara adoker aliba ajanga Middle East nung senzusenpong mesademi kumogo.

US aser Israel nati Iran amakba tenzüka den Iran-ia meyiper linük balala amakba sülen Iraq airspace February 28 nungi shibanger lir.

Arnold, shibai May 2025 nung Iraq manager aküm, pai Iraq adena or tanga linük nung asayaba asayartem dang anidena asayadaksüra 1986 kum sülen tang mezüngbuba World Cup atema qualify asütsü asoshi maongka aliba nung tetsüdaktsü adoktsü, ta ashi.

"Küm 40 tsüngda linük asoshi asaya tulutiba atema team tajungtiba nungdaker aser bendanglen asayaba asayartem dang asayadaksüra aji team

tajungtiba masütsü," ta pai ashi.

"Iraq nungertemi iba asaya kanga meimer. Parnok kum 40 tashi qualify mesüteti aliba ajanga teyari agütsütsü asoshi ni iba mapa agizükba lir.

"Ajisüaka tang airport ajak shibanger aliba mapang tanga lenmang ka bushitsü atema onok kanga meranga inyakdar," ta paisa shisem.

Asia nung taoba November ita World Cup qualifiers round pongububa nung Iraq-i 3-2 ta aggregate nung United Arab Emirates koka inter-continental play-off atema maongka nguteta liasü.

Bolivia aser Suriname na March 26 nü play-off semi-final asayatsü aser takoker Iraq den World Cup nung asayatsü atema tokteptsü.

BENDANGLI OSANG : Tapak 7 nungi...

Iran supreme leader inyaktsü Mojtaba...

Iran-i March 1 nü Saudi Arabia nung sepaitem alidak amakba mapang yiruba service member ka süogo, ta US mitkari ashi. Tang tashinung US sepa tenet takum samaba tejanga lir.

Shaybah oil field nung amakba drone ka khazüka yok, ta Saudi Arabia Defense Ministry ajanga Hombarnü ashi. Iba sülen parnoki Iran dang Arab linüktem maneni makra parnok takoksa tuluba asütsü ta shia liasü.

Iran Tir Masoud Pezeshkian-ibo Gulf Arab linüktem amakba anenogo ta Honibarnü ashi, saka Iran-i jembiba ama mapa kuma meinyaker, ta Saudi Arabia indang Foreign Ministry

sangdong ka nung ashi.

US ketdangsür anati, Saudi Arabia nungi tongtipang masüba personnel aser kibong ajunga ainshitsü State Department-i totuyuba agütsütsü, ta ashi. Bahrain, Iraq, Jordan, Kuwait, Lebanon, Qatar, United Arab Emirates nung US diplomatic missions aser Karachi, Pakistan nung aliba consulate nungi tongtipang staff tem dak alaka tanüngba nisung ajunga ainshitsü metetdaksüogo.

Iba rara yagi Iran nung nisung 1,230 tepsetogo, Lebanon nung 397 aser Israel nung 11 tepsetogo ta ashir. Israel-ia Lebanon south tsütsü Hezbollah den raradang sepa ana tepset, ta Deobarnü sangdong.

Kenya tzümetsüng lendong nung...

"Ni linük strategic reserves nungi relief chiyongtsütem tzümetsüng agi kongshir aliba kibongtem nem agütsütsü tetuyuba agütsüogo," ta pai ashi.

"Iba den bendenloksema sorkari yirur alirtem mesüra tzümetsüng agi kongshir alirtemi shirnok tang public health facility tem nung temang anepaludar parnok mozüki nung entokba taah agütsütsü," ta Ruto-i ashi.

Ketdangsürtemi ashiba agi, lendong agi kongshir alirtem khuret tepungbaba kümdaksütsü nükjidong nung iba jenjang agir.

Scientist temi ashiba agi, alima tatsükba kuma aoba ajanga Africa anütoklen tzümetsüng aser tsüngsarusa taliba kuma o aer.

Kidanger Somalia aser Ethiopia nungera iba yagi kongshingo.

Srikanth aser Prannoy nati anir Swiss Open asayatsü

Metsüremi/March 9, 2026 (Agencies): Mongolbarnü nungi tenzüka asayatsü aliba Swiss Open nung India nung badminton asayartem H S Prannoy aser Kidambi Srikanth nati anir asayatsü.

Tebur kija asaya nung Srikanth, shiba taoba kum Malaysia Masters aser Syed Modi International final tonga asayaogo, pa Jason Gunawan den mezüng asayatsü.

2023 World Championships bronze medallist aser Asian Games nung bronze medal angusang Prannoy mezüngbuba round nung Japan nung asayar Koki Watanabe den asayatsü.

Tebur kija asaya nungsa Tharun Mannepalli mezüngbuba round nung Japan

nung asayar Kenta Nishimoto den asayatsü aser Ayush Shetty-a Canada nung asayar Brian Yang den asayatsü. Kiran George-a mezüngbuba asaya Singapore nung asayar Loh Kean Yew den asayatsü.

Tebur tarep asaya nung world No. 4 Satwiksairaj Rankireddy aser Chirag Shetty na Singapore nung tarep Eng Keat Wesley Koh aser Junsuke Kubo na den asayatsü. India nung tarep ya taoba hopta All England Championships nungbo mezüngbuba round nung tsüka liasü.

Tebur tarep asaya nungsa Hariharan Amsakarunan aser M R Arjun na Chinese Taipei nung asayar Chen Zhi Ray aser Lin Yu Chieh na den

asayatsü.

Tetsür kija asaya nung Unnati Hooda Chinese Taipei tsür Chiu Pin-Chian aser Malvika Bansod Thailand tsür Pornpawee Chochuwong den asayatsü.

Tetsür tarep asaya nung Treasa Jolly aser Gayatri Gopichand Pullela na Chinese Taipei tsür Hu Ling Fang aser Zheng Yu Chieh na den asayatsü.

Tarep temeyoktep asaya nung Dhruv Kapila aser Tanisha Crasto na Denmark nung Jesper Toft aser Amalie Magelund na den, aser Rohan Kapoor o Gadde Ruthvika na Thailand nung Ruttanapak Oupthong aser Jhenicha Sudjaipraparat den asayatsü.

BILEMDANGANG

"Tepela ya aseni inyakba nungi adoker."